

四庫全書

史部

欽定四庫全書

欽定續文獻通考卷二百二十五

物異考

雷震

宋寧宗嘉定十七年九月丁丑雷

臣等謹按王圻續通考載寧宗嘉定十四年正月地震大雷是春金人入蘄黃二州吏部侍郎兼侍讀彭龜年知事勢將變因極陳小人竊權號令不

時之弊所奏極為剴切令考列傳龜年卒于開禧
二年距是時已十有五年矣若馬端臨通考則載
十四年十六年俱冬雷亦不載正月大雷也

理宗寶慶二年九月庚申雷十月辛丑又雷 紹定元
年十一月庚辰雷 二年九月庚辰雷 五年九月乙
巳雨電雷 端平二年十二月辛亥雷 三年九月庚
午雷辛未祀明堂大雨震電十月戊戌雷 嘉熙元年
九月丁巳雷 二年九月己酉雷十月庚戌雷 淳祐

元年正月庚子雷十二月丙寅雷 二年九月己丑雷

十一月己亥日南至雷電交作 三年三月丙辰雷

四年九月乙丑丁卯雷十月戊申雷 五年正月己酉

雷 七年九月癸酉雷 八年九月辛酉雷是日祀明

堂大赦 十年十一月壬午雷 十二年十二月丁丑

立春雷 寶祐二年十二月癸未雷 三年正月己未

迅雷九月甲午朔雷 五年正月乙巳雷十月癸巳雷

六年正月戊寅雷 開慶元年十月乙酉雷 景定

二年十月戊戌己亥俱雷電

臣等謹按宋史理宗紀寶祐三年正月起居郎牟子才上疏言元夜張燈侈靡倡優下賤奇技獻笑媢汚清禁上累聖德今震霆示威願聖明覺悟天意可回帝納其言錄以備考

度宗咸淳三年十月甲戌大雷電 九年十月癸亥雷十二月丙辰壬戌雷

王圻曰宋季福州晝錦坊有賣米者一夕雷震死

其家三人大書屏上凡九字其文曰𠂔𠂔𠂔𠂔𠂔
𠂔𠂔𠂔𠂔𠂔人不能識有一老者曰但于其中直貫
一畫則成文矣謂米中用水糠中用木查也蓋賣
米之家實如是云

遼太宗天顯十二年五月壬申雷震開皇殿

景宗乾亨二年五月雷火乾陵松

互見火災門

金穆宗攻阿蘇日辰巳間忽暴雨昏曠雷電環阿蘇所
居

是夕有巨火聲如雷墜阿蘇城中遂攻下之

熙宗皇統九年四月壬申夜大風雨雷電震壞寢殿鴟尾

哀宗天興元年九月辛丑夜大雷

工部尚書博斯納震死

元太祖即位之五年冬大雷

先是四年六月帝西討回回國禡旗之日雨雪三尺帝疑之耶律楚材曰元冥之氣見于盛夏克敵之徵

也至是復問之對曰回回國主當死于野後果驗

順帝至正三年秋興國路永興縣雷擊死縣人尹章

是時方大旱雷擊死糧房貼書尹章于縣治有朱書
在其背云有旱却言無旱無灾却道有灾未庸殲厥
渠魁且擊庭前小吏

十年六月戊申廣西臨桂縣雷震死邑民廖廣達十二
月庚子汾州孝義縣雷雨 十一年十二月台州大雨

震電 十三年十二月汾州雷雨 十四年十二月孝

義縣雷雨 十九年十二月台州大雷電 二十一年

十一月戊申温州樂清縣雷 二十七年十月奉元路

雷電

臣等謹按王圻續通考順帝至正二十二年十月

初五日大雨雷電紀志皆不載

明太祖洪武六年十一月戊申雷電交作 十三年五

月甲午雷震謹身殿六月丙寅雷震奉天門十月甲戌

雷電十二月己巳廣州大風雨雷電 十八年二月甲

午雷電雨雪 二十一年五月辛丑雷震元武門獸吻
六月癸卯雷震洪武門獸吻

宣宗宣德九年六月甲子雷震大祀壇外西門獸吻

英宗正統八年五月戊寅雷震奉天殿鸛吻七月辛未

雷震南京西角門樓獸吻是日大同巡警軍至沙溝風

雷驟至裂膚斷指者二百餘人 九年正月辛亥朔雷

雷大雨閏七月壬寅雷震奉先殿鸛吻 十一年十二

月壬寅大雨雷電翼日乃止 十四年六月丙辰南京

風雨雷電謹身殿災

臣等謹按英宗正統八年五月王圻續通考作四月十四年六月則云震雷風雨驟作謹身奉天華蓋殿俱災今從志

景帝景泰三年六月庚寅雷擊宮庭中門傷人

英宗天順二年六月己卯雷震大祀殿鸛尾 四年六

月癸丑雷毀薊州倉廩四

臣等謹按明史英宗紀復辟之元年六月己亥大

風雨雹壞奉天門鳩吻王圻續通考訛為大雷雹
今入雨雹門

憲宗成化三年六月戊申雷震南京午門正樓 五年
二月乙卯又震山川壇具服殿之獸吻 十二年十一
月癸亥南京大雷雨 十三年二月甲戌安慶大雪既
而雷雹交作十一月辛未冬至杭州大雷雨戊寅荊門
州大雷雹雨雪 十七年七月己亥雷震郊壇承天門
脊獸十一月丁酉江南大雷雨雪

臣等謹按王圻續通考載憲宗成化二十三年六月雷震南京午門志不載

孝宗弘治元年五月丙子辰刻南京震雷壞洪武門獸吻已刻壞孝陵御道樹六月己酉雷壞鷹揚衛倉樓聚寶門旗杆二年四月庚子雷毀神樂觀祖師殿三

年七月壬子雷壞午門西城牆六年閏五月丁未薊州大風雷拔木偃禾牛馬有震死者十二月壬戌南京雷雨拔孝陵樹七年六月癸酉南京雷雨拔樹七月

丙辰福州雷燬城樓 八年十二月丙子長沙大雷電

雨雪丁丑南昌彭水俱大雷電雨雪雹大木折 十年

四月雷震宣府西橫嶺之南山傾三十餘丈七月乙卯

雷擊吉王府端禮門獸吻 十二年四月丙午雷震楚

府承運殿 十四年閏七月庚辰福州大風雷擊壞教

場旗杆城樓大樹

武宗正德元年五月壬辰雷震青州衣甲庫獸吻有火

起庫中六月辛酉雷擊西中門柱脊暴風折郊壇松栢

大祀殿及齋宮獸瓦多墮落者丙子南京暴風雨雷震
孝陵白土岡樹十二月己巳朔南通州雷再震 四年
十二月壬寅杭州大雨雷電越二日復作 五年六月
丙申雷震萬全衛紫溝堡斃墩軍四人 七年五月戊
辰雷震餘千萬春寨旗杆狀如刀劈閏五月丁亥雷震
成都衛門及教場旗杆 十年閏四月甲申薊州賺狗
崖東墩及新開嶺關雷火震傷三十餘人 十二年八
月癸亥南京祭歷代帝王雷雨大作震死齋吏十二月

庚辰瑞州大雷電 十六年八月雷擊奉天門

世宗嘉靖二年五月丁丑雷擊觀象臺 四年七月己

丑雷擊南京長安左門獸吻 五年四月戊寅雷擊阜

城門城樓南角獸吻及北酒舖旗杆 十年六月丁巳

雷擊德勝門破民屋柱斃者四人癸亥雷擊午門角樓

及西華門城樓柱 十五年六月甲申雷擊南京西上

門獸吻震死男婦十餘人 十六年五月戊戌雷擊謹

身殿鵠吻 二十八年六月丁酉朔雷震奉先殿左吻

及東室門槁 三十八年六月丙寅雷擊奉先殿門外
南西二牆

穆宗隆慶元年八月大暑雷震次日大寒如嚴冬是夕
雷震達旦 四年六月辛酉雷擊園丘廣利門鵠吻

神宗萬曆三年六月己卯雷擊建極殿鵠吻壬辰又擊
端門鵠尾 六年七月壬子雷擊南京承天門左簷

十三年七月戊子雷震郊壇廣利門震傷榜題利字及
齋宮北門獸吻 十六年八月壬午雷震南京舊西安

門鐘鼓樓獸頭 十九年五月甲戌太平路喜峯路並
雷擊墩臺折傷官軍 二十一年四月戊戌雷擊孝陵
大木 二十二年六月己酉雷雨西華門灾七月壬辰
雷擊祈穀壇東天門左吻 二十五年七月庚寅朔雷
燬黃花鎮臺垣及火器 三十二年五月癸酉雷燬長
陵樓又燬薊鎮松棚路墩臺 三十三年五月庚子大
雷電擊燬南郊望燈高杆 三十七年八月甲寅雷劈
西城上旗杆

光宗泰昌元年十月己未雷燬淮安城樓

愍帝崇禎六年十二月丁亥大風雪雷電 九年正月

甲戌雷燬孝陵樹 十年四月乙亥薊州雷火焚東山

二十餘里 十二年七月雷擊破密雲城鋪樓

所貯砲木皆碎

十月乙未立冬雷電大作 十四年四月癸丑雷火起

薊州西北焚及趙家谷

延二十餘里

六月丙午雷震宣府西

門城樓 十五年四月癸卯雷震南京孝陵樹

火從樹出

十六年五月癸巳朔雷震通夕不止

次日見太廟神主橫倒諸銅器為火

所錄錄
而成灰

六月丙戌雷震奉先殿鵲吻

槁扇皆裂
銅環盡燬

物自鳴

宋寧宗慶元元年夏建昌軍民居木柱有聲如牛鳴者
三日乃止

臣等謹按馬端臨通考載物自鳴終於光宗紹熙
二年此條據志補錄

恭帝德祐二年五月乙未朔黎明有大聲出府中衆皆
驚仆

是日左丞相陳宜中等立帝熈于福州改元景炎

遼太宗大同元年四月丙辰朔自汴州行次赤岡夜有

聲如雷起于御幄

聖宗太平五年三月魚兒灤有聲如雷而徙

互見水
異門

金海陵正隆六年臨潢府聞空中有車馬聲

時仰視見風雲杳靄神鬼兵甲蔽天自北而南仍有

語促行者未幾海陵南征遇弒

世宗大定十三年八月丁丑夜空中有音樂聲

時策試進士于憫忠寺夜半忽聞音樂聲起東塔上
西達于宮考官完顏佛寧李宴等以為文運始開得
賢之兆

哀宗正大五年八月御座上聞若有言者索之不見
其言若曰不放捨則何

元順帝至正七年五月庚戌台州路黃巖州海濱無雲
而雷 十年六月戊申廣西桂臨縣無雲而雷 十二
年三月丙午寧國路無雲而雷

王圻曰順帝至正十二年寇起蘄黃將由義興取道犯浙西義興王子明多藏三代彝鼎又購得一商彝鑿深窖以埋之既入窖彝作牛鳴者七夜因取出寄田家窖後遭發掘獨此彝得存

臣等謹按王圻續通考先是順帝至元四年冬江浙行省官立僧格沙布鼎輩德政碑穹窿莫比特缺坐石時若晦者素善諂媚因以揚和王墳域所有為言役人夫數千拖曳而至畢工之日省中火

爐鳴直至昧爽方休嗣是夜以為常越明年僧格
敗諸人俱罹奇禍皆志所不載

十三年十二月庚戌京師無雲而雷少頃有火墜于東
南是日懷慶之河南修武潞州之襄垣縣皆無雲而雷
聲振天地 十八年三月辛丑夜大同路西方有聲如
雷至夜半空中有兵戈聲

臣等謹按王圻續通考載順帝至正十六年正月
嘉興楓涇鎮戴君實家柳樹若牛鳴者三主人與

僕從悉聞之斬樹不一月苗軍抄掠資產又兩月
屋燬于兵是歲寒食日海鹽州趙初心率子侄輩
詣先隴汎埽松楸忽聞如老鸛作聲憂憂不絕審
所在乃是一栢樹頃間衆樹同聲和之一二時方
止舉家惶惑至八月苗軍火其居明年六月紅巾
掠貨財婦女而姪善如死於難二十四年四月十
五日華亭西清菴廊屋每間屋柱皆有聲其聲如
以桶覆水面而擊其底者人以手按之則振掉而

起經時方止志不載

明太祖洪武五年八月己酉徐溝西北空中有聲如雷
十一年瑞昌有大聲如鐘自天而下

王圻曰或以為鼓妖次年官民俱災又十三年三
月貴州布政司使蔣延瓚言去年北征班師詔至
思南府婺川縣大岩山有聲連呼萬歲者三咸謂
恩威遠加山川效靈之徵禮部尚書呂震請率羣
臣表賀帝以山谷空虚呼噪相應理或有之布政

司不察以為祥大臣不能辨其非皆事近阿諛非君子事君之道也不許

英宗天順六年九月乙巳夜天無雲西北方有聲如雷
七年二月晦夜空中有聲

大學士李賢奏無形有聲謂之鼓妖上不恤民則有
此異

憲宗成化十三年正月甲子代州無雲而雷 十四年
八月戊戌早朝聞若有兵甲聲

時東班官聞之辟易不成列久之始定

孝宗弘治六年六月丁卯石州吳城驛無雲而震者再
十七年六月甲申江西廬山鳴如雷

武宗正德七年文登秦始皇廟鐘鼓自鳴

成山衛亦如之
互見金異門

臣等謹按王圻續通考謂是年三月二十三日山

東文登縣奏聞存以備考

世宗嘉靖二十九年二月甲子隆慶州張山營堡山鳴
穆宗隆慶二年三月直隸新城縣空中迅響如雷

神宗萬曆十二年十二月己未蕭縣山鳴如驚濤澎湃
竟夜不止 二十八年八月戊戌西北方有聲如雷

臣等謹按王圻續通考載西寧古浪城樓大鐘連

鳴三日係萬曆二十六年五月事

熹宗天啟七年八月丁巳

愍帝即位

朝時空中有聲如天鼓

發於殿西

愍帝崇禎十二年十二月乙未蕭縣山鳴是月西山大
鳴如雷如風濤 十三年二月壬子浙江省城門夜鳴

十六年冬建極殿鳩吻中有聲

聲似鶉鳩曰苦苦其聲漸大復作犬吠聲三日夜不止明年三月辛丑孝陵夜有哭聲亦鼓妖也

臣等謹按馬端臨通考於物自鳴後載自動一門始于周之鼎震終于宋之鏡舞考遼金元諸史俱無可見王圻續通考亦畧而不書今姑仍其闕焉
物自壞

宋度宗咸淳九年賈似道家廟棟自壞

丞相賈似道起復之日在越上私第方拜家廟忽聞
內有裂帛聲衆賓愕然密詢左右知家廟棟裂皆遂
巡而退

遼天祚帝保大二年十一月居庸關崖石自崩

金宣宗元光二年七月乙卯丹鳳門壞壓死者數人

元順帝元統二年二月甲申太廟木陸壞至正八年

五月丁酉京城崩十一年岳州府門忽自倒柱脚向

天

明太祖洪武十六年正月己巳朔早朝鐘忽斷為二

見

金異

門

臣等謹按王圻續通考祇載金宣宗元光二年元順帝至正十一年有物自壞二事考歷代史亦不多見

欽定續文獻通考卷二百二十五

欽定四庫全書

欽定續文獻通考卷二百二十六

物異考

人異

宋寧宗慶元元年永州民產兒有角翅尤溪縣民陳油妻產二子肢體異而胸膈相連

臣等謹按王圻續通考載陳升之將生母荆國夫人常聞排榻有聲者累日索之無所見既產升之

其聲遂息得大蛇蛻於褥下鱗甲首尾俱備惟腹
下脫一鱗升之既長腹亦有鱗可磨指甲封秀國
公楊億初生母章氏夢羽衣人自言武夷仙脫化
既誕則一鶴雛也舉家驚駭貯而棄之江其叔曰
吾聞世之異人其生亦異如姜嫄有棄簡狄有契
乃追至江濱開視之鶴已脫而嬰兒具焉體猶有
紫毳尺餘次日乃落考列傳多不符姑從附錄

遼穆宗應歷十二年八月女真進鼻上毛小兒

金太祖駐軍寧江人馬異狀

帝未即位時軍寧江駐高阜薩哈仰見太祖體如喬松所乘馬如岡阜之大帝亦視薩哈人馬異常薩哈因白所見太祖喜曰此吉兆也即舉酒酌之曰異日成功當識此地

熙宗天眷元年夏熙州見一人乘白馬紅袍玉帶如少年官狀馬前有六蟾蜍

凡三時乃沒郡人競往觀之

海陵正隆元年五月辛亥修容安氏閣女御為妖所憑
舞譟宮中命殺之

世宗大定十二年三月宛平人張孝善子曰合得旦死
至暮復活

十三年正月尚書省奏合得復活自云本是良鄉王
建子喜兒而喜兒前三年已死建驗以家事能具道
之此蓋假屍還魂擬付王建為子帝曰若是則姦倖
小人競生詐偽瀆亂人倫止付孝善

哀宗正大元年有人衣麻衣望承天門大笑者三大哭者三

有司拘而問之其人曰我先笑者笑許大天下將相無人後哭者哀祖宗國家破蕩至此也有司議置重典帝曰今詔草澤之士並許直言雖涉譏訕亦不治罪況此人言亦有理只不應笑哭闕下耳乃杖之

元太祖十世祖勃端察爾母夢金色神人有娠

勃端察爾母阿倫果幹寡居夜寢帳中夢白光自天

窗中入化為金色神人來趨卧榻阿倫果幹驚覺遂有娠產一子即勃端察爾也

世祖中統二年九月河南民王四妻靳氏一產三男

唐志云物反常為妖陰氣盛則母道壯也

至元元年四月黃崗民婦生男狗頭二年正月武城

縣民王氏妻崔氏一產三男八年平灤路昌黎縣民

生子中夜有光

詔加鞠養或以為非宜帝曰何幸生一好人毋生嫉

心也

十年八月甲寅鳳翔寶雞縣劉鐵牛妻一產三男 二
十年二月高州張丑妻李氏一產三男一女四月固安
州王得林妻張氏懷孕五月生一男四手四足圓頭三
耳一耳附腦後生而即死 二十二年四月江陵民張
二妻鄧氏一產三男 二十八年九月襄陽南漳縣民
左氏妻一產三男

成宗大德元年五月辛未遂寧州軍戶任福妻一產三

男十一月遼陽打鷹布呼齊戶諾海妻哈瑪爾一產四男
四年三月寶應縣民孫奕妻朱氏一產三男
十年正月江州湖口縣民方丙妻甘氏一產四男

泰定帝泰定元年十月秦州成紀縣趙思直妻張氏一產三子
四年十二月絳州太平縣趙氏婦一產三子
致和元年三月太平路當塗縣楊太妻吳氏一產三子
順帝至元元年正月雲南婦人一產三男又廣西師宗
州夢生妻適和一產三男汴梁祥符縣市中一乞丐婦

人忽生髭鬚 二年四月黃州黃岡縣周氏婦產一男
即死狗頭人身

王圻曰至元三年民間謠言拘刷童男女以故婚
姻不問長幼平江蘇達卿時為上海縣吏有女年
十一贅里人浦仲明之子為婿明年生一子

至元九年棗陽縣民張氏婦生男甫及周歲暴長四尺

許容貌異常蟠腹擁腫見人輒嬉
笑如世俗所畫布袋和尚云

十年春有人伏麗

正門樓斗拱中

人伏斗拱內不知何自而至遠近聚觀之門尉以白
留守達於都堂上聞有旨令取付法司鞠問但云薊
州人問其姓名詰其所從來皆惘若無知惟妄言禍
福而已乃以不應之罪笞之忽不知所在

二十三年五月霸州民王馬駒妻趙氏一產三男六月
亳州務李閨妻張氏一產三男

明太祖洪武二十四年八月河南龍門婦司氏死三年
借屍復生

河南府龍門內有婦人司牡丹者為夫蹴死越三年
同鄉袁馬頭死而復甦自言我司牡丹也召其家人
問之良是云死後為薄姬廟侍婢今借屍還魂耳時
懿文太子自陝還聞于上乃賜以鈔帛令兩家給養
宣宗宣德元年十一月行在錦衣衛校尉綦榮妻皮氏
一產四子

英宗天順四年四月揚州民婦一產五男

憲宗成化十三年二月南京鷹揚衛軍陳僧兒妻朱氏

一產三男一女 十七年六月宿州民張珍妻王氏臍
下右側裂生二子 二十年十二月徐州婦人肋下生
瘤久之漸大兒從瘤出 二十一年嘉善民鄒亮妻初
乳生三子再乳生四子三乳生六子

孝宗弘治十一年六月騰驤左衛百戶黃盛妻宜氏一
產三男一女 十六年五月應山民張本華妻崔氏生
鬚長三寸時鄭陽商婦生鬚三縷約百餘莖

世宗嘉靖二年六月曲靖衛舍人胡晟妻生一男兩頭

四手三足 四年橫涇農孔方脇下產肉塊剖視之一
兒宛然 五年江南民婦生妖六目四面有角手足各
一節獨爪鬼聲 十一年當塗民婦一產三男一女
十二年貴州安衛軍李華妻生男兩頭四手四足 二
十七年七月大同右衛叅將馬繼舍人馬錄女年十七
化為男子

穆宗隆慶二年十二月靜樂男子李良雨化為婦人
五年二月唐山民婦生兒從左脇出

神宗萬曆十年浙川人化為狼 十八年南宿州民婦

一產七子

七子髮膚紅白黑青各色時以為妖屬人瘞之是夜里有長者夢神謂曰明七將軍在阨過爾門當掾之長者起覘門外果見所識人抱一筐衣覆其上問知其故遂如神言收養越數年婦老竟無子思昔所瘞之子微聞在長者家因屬人訪求其子長者曰神以兒屬我安有還理於是與見而兩家子焉

三十七年六月繁峙民李宜妻牛氏一產二女頭面相連手足各分 四十六年廣寧衛民婦產一猴二角四齒是時大同民婦一產四男

愍帝崇禎八年夏鎮江民婦產一子頂戴兩首與母俱斃 十五年十一月曹縣民婦產兒兩頭頂上有眼手過膝

詩異

臣等謹按童謠輿誦自昔志之蓋語同天籟事未

形而機先動誠格物之君子所不廢也但小說諸家或彼此相襲異代如出一口或術數相矜事後強為傳會類皆不足徵信即載出正史如宋之紙錢使不行寒到五更頭語涉讖緯詭誕非若謠誦出於自然者可比故概從削略

宋度宗咸淳五年都人以碾玉為首飾有詩曰京師禁珠翠天下盡琉璃

金章宗泰和八年有童謠云易水流汴水流百年易過

又休休兩家都好住前後總成留

至貞祐中舉國遷汴

宣宗貞祐元年衛州有童謠曰團戀冬劈半年寒食節
沒人烟

明年正月元兵破衛城遂邱墟

興定五年京師有童謠云青山轉轉山青耽誤盡少年
人

盖言是時人皆為兵轉鬪山谷戰伐不休當至老也

元世祖初宋未下時江南謠言江南若破百雁來過

當時莫喻其意及宋亡乃知指丞相已延也

順帝元統二年六月彰德雨白毛民謠曰天雨鼉事不齊至元三年彰德雨線民謠云天雨線民起怨中原地事必變五年八月京師童謠云白雁望南飛馬札望北跳

臣等謹按至元三年王圻續通考作至正十六年誤今從志

至正五年淮楚間童謠云富漢莫起樓貧漢莫起屋但
看羊兒年便是吳家國 十年河南北童謠云石人一
隻眼挑動黃河天下反

王圻曰嗣嘉魯治河果於黃陵崗得石人一眼而
汝穎之變起

十三年蓆縣有皇舅墓元初即有謠云皇舅墓門閉運
糧向北去水渰墓門開運糧却回來

王圻曰是年中原大水水退土阜崩墓門顯露自

後天下多事海運不通卒如其謠

十六年正月松江府民謠曰滿城多是火官府四散躲城裏無一人紅軍府上座

時常熟州陷松江府印造官號給散吏兵佩帶以防奸偽號之製作畫為圓圈繞圍皆火焰圈之內一府字以府印印府字上圈之外四角府官花押故民間有是謠不二月城破悉如所言

二十八年六月壬寅彰德路天寧寺塔忽變紅色

詳見赤青

赤祥時河北有童謠云塔而黑北人作主南人客塔而
門紅朱衣人作主人公

明太祖吳元年蘇州民謠曰丞相做事業專靠黃蔡葉
一朝西風起乾鼉

時張士誠弟偽丞相士信及黃敬夫葉德新蔡彥文
用事未幾蘇州平士信及三人者皆被誅

惠帝建文初年有道士歌於途曰莫逐燕逐燕日高飛
高飛上帝畿

已忽不見是靖難之讖也

英宗正統二年京師旱街巷小兒為土龍禱雨拜而歌
曰雨帝雨帝城隍土地雨若再來還我土地

說者謂雨帝者與弟也帝弟同音城隍者邸王再來
還土地者復辟也

神宗萬厯末年有道士歌於市曰委鬼當頭坐茄花遍
地生

北人讀客為楷茄又轉音為魏忠賢客氏之兆

愍帝崇禎十七年流賊張獻忠毀迴瀾塔有古碑云修塔余一龍拆塔張獻忠歲逢甲乙丙此地血流紅妖運終川北毒氣播川東吹簫不用竹一箭貫當胸漢元興元年丞相諸葛孔明記

塔在成都東門外鎮江橋萬厯中布政余一龍所修也獻忠破蜀毀之穿地取磚得碑上有篆書如此

本朝大兵西征獻忠被射而死時肅王為將又有謠曰鄴臺復鄴臺曹操再出來賊羅汝材自號曹操乃其

兆也

訛言

宋寧宗時浙東訛言嵎縣有虎神募人捕之

理宗時僉書樞密院事林存為賈似道所擯死於漳漳有富民蓄油貼木甚佳林氏子弟求之價高不可得因撫其木曰收取收取待賈丞相用恭宗德祐元年似道謫死郡守與之經營竟得此木以殮

金衛紹王即位改元大安四年改曰崇慶既而又改曰

至寧有訛言曰三元大崇至矣俄而有呼沙呼之變

王圻曰大崇者大蟲也俗稱虎為大蟲

宣宗貞祐三年六月京城中夜妄相驚逐狼月餘方息
元太宗九年左翼部訛言括民女帝怒因括以賜麾下
世祖至元十一年四月甲寅誅西京訛言惑衆者

成宗大德六年九月己酉龍興民訛言括童男女至有
殺其子者命捕為首者三人誅之始息

順帝至元三年五月民訛言朝廷拘刷童男童女一時

嫁娶殆盡

時訛言者謂將采童男女以授韃靼為奴婢且令父母護送直抵北交割故自中原至於江南凡品官庶人家但有男女年十二三以上便為婚嫁雖守土官吏與夫韃靼色目之人亦如之十餘日乃止

胡粹中曰人必好色然後疑其淫人必貪財然後疑其盜訛言雖起於閭閻之小人亦在上者露其機括故因以發之耳當時順帝志荒而欲縱聲色

之好不待哈瑪爾進秘密而後肆也訛言其必有
所自矣

至正元年江浙行省平章政事珠爾噶岱入城之任日
衣紅衣童謠曰火殃來矣

至四月十九日杭州灾燬官民房屋公廨寺觀一萬
五千七百五十五間燒死七十六人明年四月又灾
甚於前自昔所未有也

臣等謹按明史五行志無訛言可考惟王圻續通

考載英宗正統元年京師天旱祈雨小兒口中羣
誦雨帝雨帝城隍土地隨有土木之變已見前詩
異門又云十三年有人夢開黃榜傳第一名彭時
國子生其人言於朋輩徧傳都下又一人謂岳正
曰我昨夢見賢兄魁多士正曰若夢可信則已有
人夢彭時作魁矣其人戲曰會試廷試有兩魁二
人各占其一可也已而果然是時有童謠云衆人
知不知今歲狀元是彭時不知何自而起也

服妖

宋理宗朝宮妃繫前後掩裙而長窄地名趕上裙梳高
髻於頂曰不走落束足纖直名快上馬粉點眼角名淚
妝剃削童髮必留大錢許於頂左名偏頂或留之頂前
束以綵繒宛若博焦之狀或曰鵝角
度宗咸淳五年都人以碾玉為首飾

是時有詩云京師禁珠翠天下盡琉璃

互見詩
異門

元世祖至元二十八年九月命尚衣局織無縫衣

順帝至元五年十月許男子裹青巾婦女服紫衣不許戴笠乘馬

明武宗正德元年婦女多用珠結蓋頭謂之瓔珞 十三年正月車駕還京令朝臣用曳撒大帽鸞帶

給事中朱鳴陽言曳撒大帽行役所用非見君服皆近服妖也

十五年十二月帝平宸濠還京俘從逆者及懸諸逆首於竿皆標以白幟數里皆白

愍帝崇禎時朝臣好以紗縠竹籜為帶取其便易北方小民製幘低側其簷自掩眉目名曰不認親


其後寇亂民散途遇親戚有飲泣不敢言或掉臂去之者

射妖

金哀宗天興元年閏八月己未有箭射入宮中

臣等謹按馬端臨通考載射妖始於周宣王訖於宋寧宗慶元五年今考歷代史書惟上一條餘無

可見



欽定續文獻通考卷二百二十六

欽定四庫全書

史部

欽定續文獻通考卷二百二十七

給事中_臣劉芬覆勘

總校官內閣中書_臣孫溶

欽定四庫全書

欽定四庫全書
欽定續文獻通考卷二百二十七

物異考

毛蟲之異

宋度宗咸淳九年十一月辛卯黎明有虎出於揚州市
毛色微黑都撥發官曹安國率良家子數十人射之
制置使李庭芝占曰平日之內殺一大將於是嚮其
肉於城外而厭之

王圻曰建炎間荆南張四者虎突至其家急登梁
喘伏虎未之見也升堂脫其皮變為男子遍歷室
中及居側林莽中尋之張乃下取其皮縛置梁上
暮虎還視其皮大咤曰吾奉天符取十七人止餘
汝在善還我皮當捨汝張乃應之曰還皮易耳汝
即食我奈何曰我雖異類不忍負信遂出懷中天
符索筆勾其名擲皮下虎蒙於體復故形哮吼奮
迅跳出明日聞六十里外夜大雷震死一虎

遼太祖神冊六年十二月癸亥有白虎緣壘而上

時圍涿州是日破其郭

太宗以唐天復二年生獵者獲白鹿人以爲瑞 天顯

三年二月己亥特哩衮尼嚕古進白狼 九年正月己

亥南京進白麋 會同元年二月壬午室韋進白鹿十

月壬寅晉遣使進獨峯駝 二年四月癸巳東京路奏

狼食人 三年三月癸未獵水門獲白鹿 四年二月

丙申皇太子獲白麋 六年六月己未奚楚庫勒部進

白麋

穆宗應歷二年十一月己卯朔州民進黑兔 十四年
十二月丙午以黑兔祭神 十八年六月甲戌特烈於
雕巢中得北犬來進 十九年三月甲子漢遣使進白
鹿

聖宗統和四年十二月辛卯伐宋捷還次白佛塔川獲
自落鬬狐

帝以為吉徵祭天地

興宗重熙五年九月癸巳獵黃花山獲熊三十六

臣等謹按遼史所載白狼白麝等多互見土貢門金太祖未即位時使烏色伐高麗為具於毬場以待捷音有二麝渡水而至獲之

帝曰此休徵也克之必矣言未既而捷書至衆大異之

興宗皇統三年七月庚辰太原路進獬豸 七年十一月乙亥兵部尚書秉德進三角羊

臣等謹按三年七月庚辰志作丙寅今從紀

海陵正隆六年十月丁未大軍渡淮將至廬州獲白鹿
時自將伐宋以為武王白魚之兆

章宗泰和八年八月乙酉有虎至陽春門外

駕出射獲之

宣宗興定元年十月邠州進白兔 二年五月庚子秦

陝狼害人 元光元年十月上獵近郊獲白兔

羣臣以為瑞明日御便殿置鈴於項將縱之兔驚躍

不已忽斃几上

二年十一月開封有虎晝害人

是時屢有妖怪二年之中白日虎入正門吏部及宮
中有狐狼鬼夜哭於輦路

哀宗天興初荆王守純府第每夜羣狐號鳴秉燭逐捕
則失所在

未幾哀宗遷歸德崔立以城降而守純等皆死青城
元太祖十九年角端見

時帝至印度國駐軍鐵門關有獸高數丈鹿形馬尾
色綠而獨角作人言謂侍衛者曰汝主宜早還以問
耶律楚材對曰此瑞獸也其名角端旄星之精也能
言四方語好生惡殺聖人在位則此獸奉書而至且
能日馳萬八千里靈異如鬼神不可犯也今大軍征
西已四年蓋上天惡殺遣之告陛下願承天心宥此
數國人命實無疆之福乃班師

陶九成曰稽之前志神禹氏治水功成天降飛兔

日行三萬里而未嘗善言也又后土鐵蹄之獸善
言而未聞獨角也軒轅獲飛黃而獨角漢武獲獸
併角而五蹄又未嘗聞其善言能走也及聖祖誕
膺天命而角端出焉夫一角者所以明海宇之一
萬八千里之涉者所以示無遠弗屆也

世祖至元十九年俱藍國進黑獺一 二十四年三月
丙辰馬八兒國進奇獸一類驪而巨毛黑白間錯名阿
塔必即 二十六年六月己未西番進黑豹 二十八

年八月戊子咀喃藩邦進黑獅子

王圻曰至元二十八年虎入南城翰林侍講學士
趙與熏上疏言權臣專政之咎

成宗元貞二年正月海州年平縣獲白鹿於聖水山以
獻

臣等謹按元貞惟有二年志作三年誤也

武宗至大二年九月占八國貢白面象

英宗至治二年二月辛亥諸王徹伯爾遣使進文豹

泰定帝泰定三年九月湖州長興州民王俊家牛生一獸鱗身牛尾口目皆赤墮地即大鳴

母不乳之具圖以上不知何獸或曰此瑞也宜俾史臣紀錄

四年三月諸王保賽音遣使獻獅子十二月爪哇遣使獻金豹白猴各一

文宗天歷二年四月占臘國貢白猿
順帝至正十年彰德境內狼狽為害

夜如人形入人家哭就人懷抱中取小兒食之

王圻曰是年浙江鄉試八月二十二日夜院中彷彿見一物馳過甚疾其狀如猛獸者軍卒從而喧哄因出角端為賦題

二十三年正月福州連江縣有虎入於縣治 二十四年七月福州白晝獲虎於城西

時績溪縣嘗有羣虎入境又有猛獸如彪逐虎食之虎駭而悉去

臣等謹按元史所載毛蟲之異亦多互見於土貢

門

明太祖洪武九年十月有虎晝入漢西門傷二人

成祖永樂十六年正月陝西耀州民獻元兔

尚書呂震請賀不許

宣宗宣德八年閏八月編脩許彬進麒麟獅子福鹿元

虎稱為四祥

孝宗弘治十一年六月有熊自西直門入城

時郎中何孟春謂熊入城當備盜亦宜慎火宋紹興間熊抵永嘉城州守高世則以熊字能火戒郡中慎火果延燒廬舍此其兆也是年城內多火災

世宗嘉靖五年七月南城縣有虎具人手足 四十五年六月大醫院吏目李乾獻免體備五色以為瑞免

臣等謹按王圻續通考三十七年胡宗憲獻白虎白鹿三十九年秋宗憲又進白鹿壽芝四十年春正月陝西商南山萬壽宮前芝叢中土人得白鹿

巡撫以獻是年二月南京錦衣衛指揮徐繼勳獻

白鹿四十三年甲子五月十八日又得一瑞桃

明史

世宗紀作乙卯三月十四日
獲桃於御帳羣臣表賀是日內畜玉兔生二子

閣臣徐階等率百官上表賀蓋其時樂報嘉祥羣
相獻媚故不特醫院小臣已也又其事見於土貢
門者甚多茲不贅載

麒麟

金興宗皇統五年閏十月戊寅大明府進牛生麟

元成宗大德九年二月大同平地縣穆爾德濟家牛生麒麟而死

武宗至大四年六月

時仁宗已即位

大同宣寧縣民瑪竒家牛

生一犢其質有鱗無毛其色青黃類麟以其尊上之

臣等謹按王圻續通考載仁宗皇慶元年六月武

安樂陽村產麒麟二年二月樂陽村麒麟又生始
生其母懼而不近三步之外直視之而鳴麟亦鳴
聲不類牆史不載

英宗至治元年三月己丑大同路麒麟生

泰定帝泰定三年湖州府長興州民家牛生一獸麟身

牛尾

互見毛蟲之異門

順帝至正九年三月陳州牛生黃犢火光滿室麻頂綠角間生綠毛不乳而死

明成祖永樂十二年榜葛刺王表獻麒麟

上命免賀

十三年麻林國進麒麟

尚書呂震請表賀上曰翰林往日修五經四書性理大全朕則許之麒麟有無何所損益其已之

臣等謹按外國獻麒麟互見土貢考

駟虞

臣等謹按馬端臨通考麒麟後附以駟虞今考宋寧宗慶元以後及遼金元明正史內俱未之見惟王圻續通考有三條載入毛蟲之異一門謹錄於左

明成祖永樂二年秋周王以駒虞來獻 十一年六月

山東曹縣獻駒虞白質黑章性仁而馴

宣宗宣德四年二月襄城伯李隆獻駒虞二素質黑文
馴狎不驚

馬異

宋寧宗嘉定十三年華容鄧氏馬產龍駒

事聞命有司立馬監於此以識其祥後復產於其隣
又將粹翁政和人宋李爲太學生元混一天下隱於

滿月山嘗言其先世家九峰山下畜一牝馬舍側有
龍潭馬入浴其中龍與之媾而生龍駒龍首馬身狀
如負河圖者後牧於山林竟失所在

臣等謹按遼金二代無馬異可考

元順帝至正二年七月拂郎國貢異馬長一丈三尺三
寸高六尺四寸身純黑後二蹄皆白

明成祖永樂十八年九月諸城進龍馬

民有牝馬牧於海濱一日雲霧晦冥有物蜿蜒與馬

接產駒具龍文其色青蒼謂之龍馬云

宣宗宣德七年五月忻州民武煥家馬生一駒鹿耳牛尾玉面瓊蹄肉文被體如鱗七月滄州畜官馬一產二駒州以為祥獻於朝帝曰物理之常何足異也

憲宗成化十七年六月興濟馬生二駒

孝宗弘治元年二月景寧屏風山有異物成羣大如羊狀如白馬數以萬計首尾相啣迤邐騰空而去

牛禍

宋理宗端平元年八月紹慶府黃登進對奏到任後牛生獨角

臣等謹按黃登進對疊奏祥瑞王圻續通考備載之不足信也遼則無可見者

金熙宗皇統七年十一月乙亥兵部尚書完顏秉德進三角牛

元世祖至元十六年四月益都樂安縣朱十五家牛生犄犢兩頭四耳三尾其色黃生而即死

武宗至大四年大同宣寧牛生一犢狀類麟

泰定帝泰定三年湖州長興州牛生一獸鱗身牛尾

臣等謹按上二條互見毛蟲之異及麒麟門

順帝至正十年秋襄陽民家牛生犢五足前三後二

十六年春汴梁祥符縣牛生犢雙首二日即死 二十

八年五月東昌鄆城縣錢鎮撫家牛生黃犢六足前二

後四二日而死

明武宗正德十二年徐州牛產犢一頭二舌兩尾八足

世宗嘉靖五年七月南陽牛產犢一首兩身 六年十一月漳浦有牛產犢三目三角 十一年二月銅仁黃特產犢滿身有紋即死 十二年山東平山衛牛生犢有紋前兩足及尾悉具鱗甲中皆毳毛

王圻曰嘉靖四十年福建漳浦縣牛生犢三目三角人以為牛妖

神宗萬曆十三年九月光山牛產一物火光滿地鱗甲森然一夕斃

犢雙頭三眼兩鼻二口 三十八年三月獲嘉牛產犢
一身兩頭四眼四耳兩口兩足一尾 三十九年二月
汲縣牛產犢一膊兩頭兩口四眼兩耳七蹄四月降夷
部牛產犢人頭羊耳 四十五年八月開州牛產犢兩
口三眼

臣等謹按王圻續通考萬曆二十四年正月瀘州
張四兒家訟於州稱四兒業屠牛衛軍馬洋回回
種也性亦嗜食牛自鄉牽牛赴州至大渡口登舟

牽繩忽斷牛奔入市過四兒家四兒恃力直前縛之不能制大懼奔入一店中牛亦追入店四兒登樓牛亦登樓觸四兒腸出死牛下樓復轉入一牛肉肆適其主他出盡毀其家器業始徐徐出郊聞之客店樓小梯狹而牛上下無碍其事甚怪

熹宗天啟元年十月會寧牛產異獸偏體鱗甲有火光
三年十月沅陵特生犢一身兩頭三尾 七年三月
莒州牛產犢如麟

愍帝崇禎十三年襄陽牛產犢兩頭二目

豕禍

臣等謹按馬端臨通考豕禍起春秋迄慶元自後宋遼金三朝無可見者

元順帝至正三年秋建寧浦縣民家豕生豚二尾八足
十五年鎮江民家豕生豚如象形 二十四年春正
月庚辰保德州民家豕生豚一身二首八蹄二尾

臣等謹按王圻續通考載至正十二年江寧永寧

鄉陸氏家一猪產十四兒內一豚人之首面手足
而猪身二十四年海鹽趙氏宰猪小腸皆已脩治
忽併如蛇蜿蜒而走將及里許而止此亦豕異也
明世宗嘉靖七年杭州民家有豕肉膜間生字

神宗萬曆二十三年春三河民家生八豕一類人形手
足俱備額上一目 三十八年四月燕河路營生豕一
身二頭六蹄二尾六月大同後衛生豕兩頭四眼四耳
四十七年六月黃縣生豕雙頭四耳一身八足七月

寧遠生豕身白無毛長鼻象嘴

熹宗天啟三年七月辰州翫平溪生豕猪身人足一目
四年三月神木生豕額多一鼻逆生目深藏皮肉合
則不見四月榆林生豕一首二身二尾八足六月霍州
生豕二身二眼象鼻四耳四乳

愍帝崇禎元年三月石泉生豕類象鼻一目甚大身無
毛皮肉皆白 六年二月建昌生豕二身一首八蹄二
尾 十五年七月聊城生豕一首二尾七蹄

羊禍

臣等謹按馬端臨通考羊禍亦起春秋左傳迄慶元三年自後宋遼元無所考

金熙宗皇統七年十一月乙亥兵部尚書秉德進三角羊

臣等謹按此已見毛蟲之異及牛禍門以志作牛紀作羊故互載之

明神宗萬曆三十八年四月崞縣民家羊產羔一首二

眼四耳三尾八足 三十九年四月降夷部產羊羔人而羊身

犬異

宋恭帝德祐元年五月壬申揚州禁軍民毋得蓄犬城
中殺犬數萬輸皮納官

遼穆宗應曆十八年六月甲戌特烈於鵬巢中得牝犬

來進

互見毛蟲之異門

臣等謹按金史無犬異可見王圻續通考亦闕之

元成宗元貞丙申秋大都南城武仲祥家有乳犬懷胎
左脇下忽腫成瘡六七日後於瘡内生五子色皆青蒼
每當脊梁自頂至尾生逆毛一道又數日瘡亦平復
順帝至正二十一年昆明縣玉案山下產赤小犬色如
火羣吠遍野 二十二年八月上海縣金壽一家已闔
雄狗生小狗八其一嘴爪紅如鮮血

明世宗嘉靖二十年民家生一犬八足四耳四目

神宗萬曆四十七年七月懷寧民家產一犬長五寸高

四寸一頭二身八脚狀如人

下體生上之病

臣等謹按馬端臨通考載下體生上之病所有禽獸凡三條考宋寧宗以後及遼金元明正史俱無所見謹從其闕

羽蟲之異

臣等謹按王圻續通考載宋永州澹巖有馴狐凡貴客至則鳴鄒浩將至而孤鳴寺僧出迎浩怪之

僧以孤鳴為言浩常有詩云走入山來亦偶然初
聞消息與人傳馴孤底事先知得隔夜飛鳴報老
禪此應載入毛蟲之異不宜混入羽蟲也又長安
女紹蘭適任宗宗為賈湘中數年不歸睹梁燕而
語之曰吾聞燕自海東來往必由湘中欲憑汝附
書於夫言訖淚下燕頤頤若有所諾復曰若允當
拍我懷燕遂棲膝上蘭以詩繫足云一自去重湖
臨窗泣血書殷勤憑燕翼寄與薄情夫宗時在荆

州忽燕子拍於肩解足書視之感泣遂歸以年月
無所繫附錄之

遼太宗生時獵者獲白鷹人以為瑞 天顯九年八月
帝自將南伐伊喇嘉哩手接飛鴈帝異之因以祭天地
十一年九月自將援石敬瑭有飛駕自墜而死南府
額爾奇木和倫得之以獻卜之吉帝曰此從珂自滅
之兆也

景帝乾亨二年閏三月庚午有鵲飛止御帳獲以祭天

聖宗統和四年四月親伐宋次沙姑河之北淀以近侍
納穆爾所進自落鵝祭天地 九年八月壬午東京進
三足鳥

興宗重熙中崇義軍烏鵲同巢

崇義節度使劉仲政務簡靜民用不擾致有此應
詔褒遷其官

金太宗天會四年八月甲寅新城縣進白鳥 九年七
月丙申咸州所貢白雀音忽異常

時帝御西樓聽政聞白雀音忽有異起視之見東樓外光明中有像巍然高五大許下有紅雲承之若世所謂佛者乃擊跏修虔久之而沒

熙宗天眷十五年七月辛巳有司進四足雀

世宗大定二十九年十二月丁亥密州進白鷄白雉各

一

章宗明昌元年六月庚子都水進異卵

宣宗元光二年正月辛酉日午有鶴千餘翔於殿庭移

刻乃去又烏鵲夜驚飛鳴蔽天

哀宗正大六年五月隴州防禦使舒穆魯棟爾進黃鸚鵡

元太祖十世祖孛端叉兒得馴鷹以給膳

時勃端察爾居巴爾圖敖拉之地食飲無所得適有蒼鷹搏野獸而食以縉設機取之鷹即馴狎乃臂鷹獵禽以為膳或缺即繼似有天相之

世祖至元十五年四月濟南無棣縣獲白雉以獻 二

十年十月癸未羅斛國貢丹頂鶴五色鸚鵡

黃瑜雙槐歲抄曰元成宗元貞二年雙燕巢於燕人柳湯佐之宅一夕家人舉燈照蠟其雄驚墜猶食之雌彷徨悲鳴不已朝夕守巢哺諸雛成翼而去明年雌獨來復巢其處自是春去秋來凡六稔觀者譁然目為貞燕

成宗大德三年七月揚州淮安蝗在地者為鷺啄食飛者以翅擊死乃禁捕鷺

泰定帝泰定四年十二月爪哇遣使獻白鸚鵡一

文宗天歷元年十月賜特穆爾海東白鸚鵡青鸚鵡各一

至順三年二月諸王達爾嗎實哩哈爾滿各遣使來貢

金鵝鸚

順帝至元三年七月河南武陟縣鷹食蝗

時禾將熟有蝗自東來縣尹張寬仰天祝曰寧殺縣

尹毋殺百姓俄有魚鷹羣飛啄食之

互見
蝗門

臣等謹按葉夢得石林詩話江淮間有水禽號魚

虎或即中州所謂魚鷹也

臣等謹按王圻續通考載世祖至元五年秋七月
螟生牧野南尋有鸚鵡自西北踰山來方六七里
間林木皆滿遂下啄蝗食且盡乃作陣飛去此與
淮揚之驚武陟之鷹事相類紀志皆不載

至正十一年五月興國有大鳥百餘飛至郡西白郎山
巔狀如人立去而復至者數次十九年京師鵠鵝夜
鳴達旦連月乃止有杜鵑啼於城中居庸關亦如之

二十七年三月丁丑朔萊州招遠縣大社里黑風大起
有大鳥自南飛至

鳥狀類鶴色蒼白展翅如席俄頃飛去遺下粟黍稻
麥黃黑豆蕎麥於張家屋上約數升許是年大稔
明太祖洪武十一年戊午元旦早朝有鷓鴣自天而墮
見者異之

孝宗弘治十四年正月保定知府獻白鵝

尚書傳澣劾其不當奏詔斥遣之

世宗嘉靖四十一年湖廣巡撫徐南金獻白鵲

神宗萬曆二十五年二月壬午岳州民家有鴨含絮裏
火飛上屋入竹椽茅茨中火四起延燒數百家 四十三
年四月壬午雙鶴銜火飛集掖縣海神廟殿明日廟火
愍帝崇禎六年汝寧有鳥鳩身猴足鳳陽惡鳥數萬免
頭鷄身鼠足供饌甚肥犯其骨立死

鳳凰

臣等謹按馬端臨通考載鳳凰自虞至宋熙寧七

年止此後宋無可考

遼天祚帝乾統四年十月己酉鳳凰見於鄴陰

金章宗泰和二年八月丙申鳳凰見於磁州武安縣鼓
山石聖臺

時有大鳥十集於臺上其羽五色爛然文多赤黃赭
冠雞項尾潤而脩狀若鯉尾而長高可逾人九子差
小侍旁亦高四五尺禽鳥萬數形色各異或飛或蹲
或步或立皆成行列首皆正向如朝拱然初自東南

來勢如連雲聲如殷雷林木震動牧者驚惶即驅牛
擊物以驚之殊不為動俄有大鳥如鵬鷃者怒來搏
擊之民益恐奔告縣官以為鳳凰也命工圖上之留
二日西北去按視其處冀迹數頃其色各異遺禽數
千累日不能去所食皆巨鯉大者丈餘魚骨蔽地以
其事告宗廟詔中外

元順帝至正十一年廣西慶遠府有異禽雙飛見於迷
昆鄉飛鳥千百隨之

其一飛去其一留止者為獾人射死首長尺許毛羽五色有藏之以獻於帥府者久而其色鮮明如生

明熹宗天啟二年九月鳳凰至河南禹州身長丈餘百鳥相從止七日去

臣等謹按明史帝紀及五行志俱無可考

雞禍

宋度宗咸淳五年常州雞羽生距

臣等謹按遼金二代雞禍無可考

元順帝至正十七年春三月上海李勝一家雞伏七雞
一雞作牡雞狀鼓翼長鳴 十八年戊戌春正月錢塘
盧子明家一雞伏九雞一雞有四足二足在翼下不數
日皆死 二十二年龍泉縣人家一雞二形翼左右分
雄雌能鳴能伏 二十五年瑞安縣鄭鎮撫家有雄雞
生子殺之腹中有子纍纍然

明孝宗弘治十四年華容民劉福家雞雞三足 十七
年六月崇明民顧益文家雞生雞猴頭而人形身長四

寸有尾活動無聲

世宗嘉靖四年長垣民王憲家雞抱卵內成人形耳目口鼻四肢皆具

神宗萬曆二十二年六月靖邊營軍家雌雞化為雄

愍帝崇禎九年淮安民家牝雞啼躍化為雄 十年宣

武門外民家白雞喙距純赤重四十斤

或曰此鷲也所見之處國亡

十四年太倉衛指揮姜周輔家雞伏子兩頭四翼八

足

欽定續文獻通考卷二百二十七

欽定四庫全書

欽定續文獻通考卷二百二十八

物異考

龍蛇之異

宋端宗景炎三年四月有黃龍見海中

時衛王初嗣位方登壇禮畢御輦所向有龍擎空而
上既入宮雲陰不見改元祥興升碭州為翔龍縣

王圻曰宋陶弼永州人游吳中舟行忽雙鯉戲溪

上傍一老父曰此龍也行且鬪君亟去去百步許
雷大震岸圯木拔二十餘舟皆覆弼舟獨完

遼太祖神冊五年五月庚辰有龍見於伊喇山陽水上
帝射獲之藏其骨內府 天顯元年七月辛巳平旦子
城上見黃龍繚繞可長一里光曜奪目入於行宮

臣等謹按王圻續通考遼聖宗時蕭博諾幼孤貧
傭于醫家牧牛傷人稼數遭笞辱醫者常見博諾
熟寢有蛇遶身異之教以讀書聰敏好學不數年

涉獵經史習騎射仕終奚六部大王蓋龍種也事
見蕭博諾傳又載興宗時蕭柳從伐高麗遇大蛇
當路前驅者請避柳曰壯士安懼此拔劍斷蛇而
進卒破敵考列傳柳列在博諾前從伐高麗亦當
在聖宗統和中非興宗時也

天祚帝為金所逼渡河奔夏隊帥耶律廸里等刼雅里
北走至沙嶺見蛇橫道而過識者以為不祥
後雅里雖立為帝不久亦死

金太祖收國元年八月己卯黃龍現空中

熙宗天眷元年夏有龍現於熙州野水凡三日

初於水面見一蒼龍良久而沒次日見金龍一爪承一嬰兒兒為龍所戲略無懼色三日如故

皇統九年四月丁丑有龍關於利州榆林河上大風壞民居官舍

海陵正龍六年六月世宗為東京留守有黃龍見寢室

上八月復有雲氣自西來黃龍見其中

即于是年登位

大定十四年八月嘉哩赤日中白龍見于御帳之東小
港中既而乘雲上升尾猶曳地良久北去

章宗明昌五年七月丙戌有龍曳尾于殿前
是日天壽節

六年八月大雨雷電有龍起於渾儀鰲趺臺忽中裂而
摧儀仆於臺下

宣宗貞祐二年六月壬戌次宜村黃龍見於西北

元世祖至元二十年有蒼龍見汲郡農家

時六月大雨汲郡河西鄉農王氏家甫夕黑霧四塞
窓戶間寒凜不可勝視之有蒼龍蜿蜒在氣中起而
復墮者再時其女下堂驚仆於地救之乃醒問所見
亦同少頃霆震霧散失所在明日視其地鱗鬣印泥
尚宛然

頃帝至元五年六月庚戌汀州長汀縣山蛟出大雨驟
至平地湧水深三丈餘漂民居八百餘家壞田二百餘
頃

王圻曰至正十五年七月構李城東馬橋上白龍
掛烈風怪雨天闇黑如深夜壞民居百餘所大木
盡拔木自半空墮下悉折為二難以萬瓦亂飛溪
水直立人皆叫號奔走不顧妻子龍由馬橋歷城
北望太湖而去有聲如萬屋齊壓四望黑雲洶湧
失府城所在經一二時方開霽不一年為戰鬪之
地凡龍所過處荊棘寒煙視昔日之繁華頓如一
夢

至正十七年六月癸酉温州有龍鬪於樂清江中颶風大作所至有光如毬死者萬餘人八月癸丑祥符縣西北有青白龍見若相關之勢良久而散二十三年正

月甲辰廣西貴州江中有物登岸蛇首四足而青色長四尺許軍民聚觀而殺之二十四年六月保德州有

黃龍現於咸寧井中二十七年六月丁巳皇太子寢

殿新甃井成有龍自井出光焰爍人宮人震懾仆於地又宮牆外長慶寺大槐樹有龍纏擾其上良久飛去樹

皮皆剥七月益都臨朐縣有龍見龍山巨石重千斤者
得空而起 二十八年十月大同路懷仁縣河岸崩有
蛇大小相綰結可載數車

明憲宗成化五年六月河決杏花營有龍卵浮於河

大如人首下銳上圓質青白人以為龍卵云

孝宗弘治九年六月庚辰宣府鎮南口墩驟雨火發龍
起刀鞘內 十八年五月辛卯日午旋風大起雲翳三
殿若有人騎龍入雲者

武宗正德七年六月丁卯夜招遠有赤龍懸空光如火
盤旋而上十二年六月癸亥山陽見黑龍吸水聲聞
數里掘舟及舟女至空而墜十三年五月癸丑常熟
金野村迅雷震電有白龍一黑龍二乘雲並下撒去民
居三百餘家吸二十餘舟於空中舟人墜地多怖死者
是夜大雨如注五日乃息十四年四月鄱陽湖蛟龍
見

世宗嘉靖四十年五月癸酉青浦佘山九蛟並起湧水

成河

神宗萬厯十四年七月戊申舒城大雷雨起蛟百五十
八跡如斧劈山崩田陷民溺死無算

是歲建昌民樵於山逢巨蛇一角六足如雞距不噬

不驚

或言此肥鱣也

臣等謹按山海經肥鱣見則千里之內大旱此十
四年久旱之兆也

十八年七月猗氏大水二龍鬪於村得遺卵尋失十

九年六月己未公安大水有巨蛇如牛首赤身黑修二丈餘所至隄潰 三十一年五月戊戌厯城大雨二龍鬪水中山石皆飛平地水高十丈 四十五年八月安邱清河村青白二龍鬪

魚異

臣等謹按宋自寧宗嘉定後及遼金二朝不見魚異事

元順帝至正二十五年六月戊申京師大雨有魚隨雨

而落長尺許人取而食之 二十七年八月上海縣隕

魚

互見天雨
異物門

明世宗嘉靖四十一年二月乙亥德州九龍廟雨魚大
者數寸

愍帝崇禎十年三月錢塘江木梯化為魚有首尾未變
者

龜異

臣等謹按宋自寧宗以後及金元明三朝不見龜

異事

遼太宗會同三年四月乙丑南唐進白龜

五見土貢門

蟲異

臣等謹按宋自寧宗以後蟲異無可考

遼太宗會同四年七月己巳有司奏神蟲車有蜂巢成
密史占之吉

金太宗天會三年七月錦州野蠶成繭

南京帥以其絲綿來獻命賞其長吏

章宗明昌四年邢洛深冀及河北西路十六穆昆之地
野蠶成繭 承安元年六月乙丑平晉縣民利通家蠶
自成綿段長七尺五寸五分濶四尺九寸

詔賜絹十匹

元世祖至元四年六月中都順天東平等處蠶災 七
年五月東平大名等路桑蠶皆災 十七年二月真定
七郡桑有蟲食之 二十二年五月真定廣平河間恩
州大名濟南蠶災 二十三年五月廣平等路蠶災

二十五年七月乙巳保定路唐縣野蠶繭絲可為帛
二十九年真定之中山新樂平山獲鹿元氏靈壽河間
之滄州無棣景山之阜城東光益都之濰州北海縣有
蟲食桑葉盡無蠶

臣等謹按王圻續通考載至元中許州麥熟時有
青蟲如蠶食麥人無可奈何忽生大華蟲盡嚼之
成宗元貞元年四月真定路平山靈壽二縣有蟲食桑
二年五月隨州野蠶成繭數百里民取為繒 大德

元年六月平灤路蟲食桑 五年四月大都彰德廣平

真定順德大名濮州蟲食桑 七年五月濟寧等處蟲食桑

時仁宗在潛邸日奉塔濟太后駐輦懷孟頗苦蛙鳴
終夜不寐翌旦太后命近侍傳旨諭之曰吾母子方
憤憤蛙忽惱人耶自後其母再鳴故今其地有蛙而
不作聲

武宗至大元年五月大名廣平真定三郡蟲食桑

仁宗延祐七年

時英宗
已即位

四月左朔屯田蟲食麥苗

英宗至治元年五月癸巳寶定路飛蟲食桑

泰定帝致和元年六月河南德安屯蠖食桑

文宗天歷二年二月真定平山縣河間臨津等縣大名
魏縣有蟲食桑葉盡四月濮州鄆城縣大名路六月衛
輝俱蠶災

王圻曰是年三月滄州高州及南皮鹽山武城等
縣桑蟲食之如枯株

至順元年三月濮州諸縣蟲食桑葉且盡五月滄州高

唐州屬縣蟲食桑葉殆盡七月寶慶衡永諸處田生青
蟲食禾稼 二年二月深冀二州有蟲食桑為災三月
真定汴梁二路恩冠晉冀深蠡景獻等八州亦如之五
月東昌保定二路濮唐二州曹州禹城博野封邱等縣
蟲食桑皆盡六月濟寧路蟲食桑七月辰州興國二路
蟲食桑傷稼 三年三月高唐德冀諸州大名汴梁廣
平諸路有蟲食桑葉盡四月東昌濟寧二路及曹濮諸
州皆有蟲食桑

順帝至正三年六月梧州青蟲食稼 十年七月同州
蟲食稼

時同州郡守石亨祖禱于元妙觀寒雨三日蟲盡死
王圻曰至正初盧文璧尹荆山忽有一巨蛙登廳
前兩目瞠視類有所訴者令卒尾之行去縣六七
里有廢井遂跳入不出既得報徃集里社汲井獲
屍乃日前二人同出為商一人謀其財而殺之拊
捕究問抵罪死者之家云其在生不食蛙見則買

放

明景帝景泰五年三月畿南五府有蟲食桑

孝宗弘治六年八月己巳臨晉雨蟲如雪 七年三月
廣寧諸衛有黑蟲墮地大如蠅久之入於土

蝗

宋理宗紹定三年福建蝗 端平元年五月當塗縣蝗

嘉熙四年建康府蝗六月江浙福建大旱蝗 淳祐

二年五月兩淮蝗

遼聖宗統和元年九月東京平州旱蝗 開泰六年六月南京諸縣蝗

道宗清寧二年六月乙亥中京蝗 咸雍三年南京旱蝗 九年七月丙寅南京奏歸義涑水兩縣蝗飛入宋境餘為蜂所食 太康二年九月南京蝗 七年五月永清固安武清三縣蝗 大安四年八月庚辰有司奏宛平永清蝗為飛鳥所食

臣等謹按王圻續通考載壽隆四年七月南京蝗

時蕭文知易州屬縣議捕除之文曰蝗乃天災當反躬自責於是蝗盡飛去遺者亦不食苗散在草莽間為鳥鵲所食今以遼史能吏傳考之亦載其事而不紀年月未知所本也

金太宗天會二年海蘭伊勒呼水霖雨害稼且為蝗所食

熙宗皇統元年秋蝗 二年七月廣寧府蝗

海陵正隆二年秋中都山東河東蝗 三年六月壬辰

蝗入京師

世宗大定三年五月丙申中都以南八路蝗 四年八月中都南八路蝗飛入京畿

大定時宗寧為歸德軍節度使方旱蝗督民捕之視所得死蝗給米數

十六年中都河北山東陝西河東遼東等十路旱蝗二十二年五月慶都蝗蛭生散漫十餘里一夕大風蝗皆不見

章宗泰和七年六月蝗 八年四月河南路蝗六月戊子飛蝗入京畿

是年七月庚子詔更定蝗蟲生發坐罪法乙巳頒捕蝗圖於中外

宣宗貞祐三年五月河南大蝗 四年四月丙申河南陝西蝗甲辰扶風郿縣有蟲傷麥五月甲寅鳳翔及華汝等州蝗戊寅京兆同華鄧裕汝亳宿泗等州蝗六月丁未河南大蝗傷稼七月癸丑飛蝗過京師 興定元

年三月乙酉宮中有蝗 二年四月河南諸郡蝗

哀宗正大三年四月旱蝗

至六月辛卯京東大雨雹蝗盡死

元太宗十年八月旱蝗

世祖中統三年五月真定順天邢州蝗 四年六月燕

京河間益都真定東平蝗八月壬申濱棣二州蝗 至

元二年七月益都大蝗十二月西京北京順德徐宿邳

等州郡蝗 三年東平濟南益都平灤洺磁順天邢州

中都河間北京真定路蝗 四年山東河南北諸路蝗

五年六月東平等郡蝗 六年六月河南河北山東

諸郡蝗真定等路旱蝗 七年三月益都登萊七月南

京河南山東諸路蝗 八年六月上都中都大名河間

益州順天懷孟彰德濟南真定衛輝平陽歸德順德等

路淄萊洺磁等州蝗 十五年七月濮州蝗 十六年

四月大都十六路蝗六月左右衛屯田蝗蝻生 十七

年五月真定咸平沂州及連海邳宿等州蝗 十九年

五月巴實伯里部東三百餘里蝗害麥 二十一年六

月中衛屯田蝗 二十二年四月大都汴梁益都廬州

河間濟寧德保定蝗七月京師亦如之 二十五年

六月資國富昌等十六屯七月真定汴梁八月晉趙冀

三州蝗 二十六年七月東平濟寧東昌益都真定廣

平歸德汴梁懷孟蝗 二十七年四月河北十七郡蝗

二十九年閏六月東昌路乙卯濟南般陽歸德蝗

三十年六月大興縣九月登州蝗 三十一年六月東

安州蝗

王圻曰釋者謂蝗蟲有甲飛揚之類陽氣所生也
恒暘則有介蟲之孽於春秋為螽今謂之蝗劉歆
云貪虐取民則螽與魚同占

成宗元貞元年六月汴梁蝗 二年六月大都真定保
定太平常州鎮江紹興建康澧州岳州廬州汝寧龍陽
州漢陽濟寧東平大名滑州德州七月平陽大名歸德
真定八月德州彰德太原俱蝗

臣等謹按王圻續通考又載二年六月任城魚臺
須城汶上開州長垣靖豐濟河太和內黃等處蝗
考紀志皆不載

大德元年六月歸德徐邳州蝗 二年二月歸德等處

蝗四月江南山東江浙兩淮燕南屬縣百五十處六月

山東河南燕南山北五十處遼東道大寧路金源縣蝗

三年五月江陵路旱蝗七月揚州淮安屬縣蝗

在地者為

鷺啄食飛者以翅擊死詔禁
捕鷺 互見羽蟲之異門

十月隴陝蝗 四年五月

揚州南陽順德東昌歸德濟寧徐濠芍陂蝗 五年六
月順德懷孟淇州七月廣平真定等路八月河南淮南
睢陳唐和等州新野汝陽江都興化等縣蝗 六年四
月真定大名河間等路七月大都涿順固安三州及安
豐濠州鍾離鎮江丹徒等縣蝗 七年五月東平益都
濟南等路六月大寧路蝗 八年四月益都臨朐德州
齊河六月益津蝗 九年六月通泰靖海武清等州縣
八月涿州良鄉河間南皮泗州天長等縣及東安海鹽

嘉興等州蝗 十年四月大都真定河間保定河南郡

六月龍興南康諸郡蝗 十一年五月

時武宗已即位

真定河

間順德保定等郡六月保定屬縣七月德州八月河間

真定等郡蝗

武宗至大元年二月汝寧歸德二路蝗五月晉寧等路

六月保定真定八月淮東俱蝗 二年四月益都東平

東昌濟寧河間順德廣平大名汴梁衛輝泰安高唐曹

濮德揚滁高郵等郡蝗六月檀霸涿曹濮高唐泰安等

州良鄉野城厯陽合肥六安江寧句容溧水上元等縣
七月濟南濟寧般陽曹濮德高唐河中解繹耀同華等
州八月真定保定河間順德廣平彰德大名衛輝懷孟
汴梁等處蝗 三年四月鹽山寧津堂邑荏平陽穀高
唐禹城七縣蝗五月合肥野城厯陽蒙城霍邱懷寧等
縣七月磁州威州饒陽元氏平棘滏陽元城無棣等縣
八月汴梁懷孟衛輝彰德歸德汝寧南陽河南等路蝗
仁宗皇慶元年四月彰德安陽縣蝗 延祐七年四月

時英宗已即位左衛屯田蝗六月益都路蝗

英宗至治元年五月霸州蝗六月衛輝汴梁等處蝗七

月許城縣江都泰興古城通許臨淮盱眙清池等縣十

二月寧海州亦如之二年汴梁祥符縣蝗

有羣鶻食之既而復

如十二月汴梁順德河間保定慶元濟寧濮州益

都諸屬縣及諸衛屯田蝗三年五月保定路歸信縣

七月真定州諸路屬縣蝗

泰定帝泰定元年六月大都順德東昌衛輝保定益都

濟寧彰德真定般陽廣平大名河間東平等郡蝗 二
年汴梁十五縣五月彰德路六月河間東昌德濮曹景
等州厯城章邱淄州柳城荏城等縣七月般陽新城縣
蝗

臣等謹按王圻續通考元年永興蝗二年九月濟
南歸德等郡紀志皆不載

三年六月東平須城縣興國永興縣七月大名順德廣
平等路趙州曲陽滿城慶都修武等縣淮安高郵二郡

睢泗雄霸等州永平汴梁懷慶等郡及諸衛屯田九月

廬州懷慶二路蝗 四年五月大都南陽汝寧廬州等

路屬縣蝗河南路洛陽縣蝗

先有蝗可五畝羣鳥食之既數日蝗再集又食之

六月大都河間濟南大名峽州屬縣七月畿內江南蝗

藉田蝗八月冠州恩州大都河間奉元懷慶等路十二

月保定濟南衛輝濟寧廬州五路南陽河南二府博興

臨淄膠西等縣蝗 致和元年四月大都薊州永平路

石城縣鳳翔岐山縣五月汝寧府潁州衛輝路汲縣蝗

文宗天曆二年四月大寧興中州懷慶孟州廬州無為
州蝗六月益都莒密二州永平屯田府昌國濟民豐贍
諸署及汴梁七月真定河間汴梁永平淮安大寧廬州
諸屬縣及遼陽之蓋州八月保定之行唐縣並如之

至順元年五月大有千斯屯廣平大名般陽濟寧東平
汴梁南陽河南等郡輝德濮開高唐五州六月大都益
都真定河間諸路獻景泰安諸州及左都威衛屯田七
月解州華州及河內靈寶延津永城奉元晉寧興國揚

州淮安懷慶衛輝益都般陽濟南濟寧河南河中保定
河間等路武衛宗仁衛左衛率府諸屯田蝗 二年三
月陝州諸縣四月河中府六月河南晉寧二路諸屬縣
七月河南閭鄉陝縣奉元蒲城白水等縣蝗

順帝元統二年六月大寧廣寧遼陽開元瀋陽懿州蝗
八月南康路諸縣蝗 至元二年七月黃州蝗 三年
六月懷孟溫州汴梁陽武縣蝗七月河南武陟縣禾將
熟蝗 五年七月膠州即墨蝗 至正四年歸德府永

城縣及亳州蝗 十二年六月大名路開滑濬三州元

城十一縣蝗 十七年東昌荏平縣蝗 十八年六月

遼州薊州濰州昌邑膠州高密縣蝗七月京師蝗

民大飢

大都廣平順德及濰州之北海莒州之蒙陰汴梁之陳

留歸德之永城皆蝗

順德九縣民食蝗廣平人相食

十九年大都霸

州通州真定彰德懷慶東昌衛輝河間之臨邑東平之

須城東河陽穀三縣山東益都臨淄二縣濰州膠州博

興州大同寧冀二郡文水榆次壽陽徐溝四縣沂汾二

州孝義平遙介休三縣晉寧潞州及壺關潞城襄垣三縣霍州趙城靈石二縣隰州之永和沁之武鄉遼之榆社奉元及汴梁之祥符原武鄆陵扶溝杞尉氏洧川七

縣鄭之滎陽汜水許之長葛鄆城襄城臨潁鈞之新鄭

密縣皆蝗

食禾稼草木俱盡所至蔽日馬不能行填坑塹皆盈飢民捕蝗以為食或曝乾而積之又

盡則人相食

七月淮安清河縣飛蝗蔽天

自西北來凡經八七日禾稼俱盡

月蝗自河北飛渡汴梁

食田禾一空

大同路蝗 二十年益

都臨朐壽光二縣鳳翔岐山縣蝗 二十一年六月河

南鞏縣蝗

食稼俱盡

七月衛輝及汴梁滎澤縣鄭州蝗 二

十二年秋衛輝及汴梁開封扶溝洧川三縣許州及鈞

之新鄭密二縣蝗 二十五年鳳翔岐山縣蝗

王圻曰至元二十五年績溪縣有蝗自西北蔽空

而至

明太祖洪武五年六月濟南屬縣及青萊二府蝗七月

徐州大同蝗 六年七月北平河南山西山東蝗 七

年二月平陽太原汾州厯城汲縣六月懷慶真定保定

河間順德山東山西蝗 八年夏北平真定大名彰德
諸府屬縣俱蝗

惠帝建文四年夏京師飛蝗蔽天

成祖永樂元年夏山東山西河南蝗 三年五月延安
濟南蝗 十四年七月畿內河南山東蝗

宣宗宣德四年六月順天州縣蝗 九年七月兩畿山
西山東河南蝗蝻覆地尺許傷稼 十年四月兩京山
東河南蝗蝻傷稼

英宗正統二年四月北畿山東河南蝗 五年夏順天

河間真定順德廣平應天鳳陽淮安開封彰德兗州蝗

六年夏順天保定真定河間順德廣平大名淮安鳳

陽蝗秋彰德衛輝開封南陽懷慶大原濟南東昌青萊

兗登諸府及遼東廣寧前中屯二衛蝗 七年五月順

天廣平大名河間鳳陽開封懷慶河南蝗 八年夏兩

畿蝗 十二年夏保定淮安濟南開封河南彰德蝗秋

永平鳳陽蝗 十三年七月飛蝗蔽天 十四年夏順

天永平濟南青州蝗

景帝景泰五年六月寧國安慶池州蝗 七年五月畿

內蝗蝻延蔓六月淮安揚州鳳陽大旱蝗九月應天及

太平七府蝗

英宗天順元年七月濟南杭州嘉興蝗 二年四月濟

南兗州青州蝗

憲宗成化三年七月開封彰德衛輝蝗 九年六月河

間七月真定蝗八月山東旱蝗 十九年五月河南蝗

二十二年三月平陽四月河南七月順天蝗

孝宗弘治三年北畿蝗 四年夏淮安揚州蝗 六年

六月飛蝗自東南向西北日為掩者三日 七年三月
兩畿蝗

世宗嘉靖三年六月順天保定河間徐州蝗 八年四
月蝗

時帝夢黃衣者數人陛辭南行其勢甚速學士楊一
清曰黃者蝗也南方其有蝗乎是秋蝗果大起

穆宗隆慶三年閏六月山東旱蝗

神宗萬曆十五年七月江北蝗 十九年夏順德廣平

大名蝗 三十七年九月北畿徐州山東蝗 四十三

年七月山東旱蝗 四十四年四月山東旱蝗七月常

州鎮江淮安揚州河南蝗九月江寧廣德蝗蝻大起禾

黍竹樹俱盡 四十五年北畿旱蝗 四十六年畿南

四府又蝗 四十七年八月濟南東昌登州蝗

熹宗天啟元年七月順天蝗 五年六月濟南飛蝗蔽

天田禾俱盡 六年十月開封旱蝗

愍帝崇禎八年七月河南蝗 十年六月山東河南蝗

十一年六月兩京山東河南大旱蝗 十三年五月兩

京山東河南山西陝西大旱蝗 十四年六月兩京山

東河南浙江大旱蝗

蝗

宋理宗紹定三年福州蝗 端平元年五月當塗縣太

平州蝗 淳祐元年六月庚申蝗 二年五月兩淮蝗

景定三年八月浙東西螟

遼道宗太康三年五月丙辰玉田安次蠧傷稼

金章宗明昌三年秋綏德好蚘蟲生 泰和四年十二

月新平等縣好蚘蟲生

元世祖至元八年六月遼州和順縣解州聞喜縣好蚘

生 十年諸路蟲蝻 十一年諸路好蚘等蟲災凡九

所 十八年高唐夏津武城等縣蟲害稼 二十三年

五月辛卯霸州鄆州蝻十月壬戌興化路仙游縣蟲傷

禾 二十四年鞏昌好舛為災 二十七年四月發州

螟害稼

時雷雨大作螟盡死是年發州大有

成宗元貞元年六月利州龍山縣益州明山縣螟八月

金復州屯田有蟲食禾 二年五月濟州任城縣螟

大德七年四月衛輝路辰州螟五月濟寧東昌濟南般陽益都蟲食麥閏五月汴梁開封縣亦如之 九年七

月桂陽郡螟

武宗至大元年五月東平東昌益都等郡蝻

仁宗皇慶二年五月檀州及獲鹿縣蝻七月興國屬縣

蝻

延祐七年四月

時英宗已即位

左翊屯田蟲食麥苗七月

霸州及唐邑縣蝻

泰定帝泰定四年七月奉元路咸陽興平武功三縣鳳
翔府岐山等縣蚘蝻害稼

王圻曰泰定二年處州蝻

文宗天歷二年淮安廬州安豐三路屬縣蝻

順帝至正十年七月同州蟲食稼

五見蟲異門

王圻曰是年處州螟十六年亦如之

十九年五月濟南章邱鄒平二縣蝻五穀不登八月襄垣縣螟蝻二十二年春衛輝路螟六月萊州膠水縣好蚘七月掖縣好蚘生害稼二十三年六月寧海文登縣好蚘生七月萊州招遠萊陽二縣及登州寧海州亦如之

鼠妖

臣等謹按宋遼金三史無鼠妖可見王圻續通考亦闕

元世祖至元二十二年六月馬湖田鼠食稼殆盡

總管祠而祝之鼠悉赴水死

成宗大德二年二月甘肅沙州鼠傷禾稼

順帝至正二十年八月慶陽延安寧安等州野鼠食稼

初由鶉卵化生既成牝牡生育日滋百畝之田一夕

俱盡

二十六年泗州潁淮兩岸有灰色黑鼠暮夜出穴成羣
覆地食禾

王圻曰至正十五年湖廣羣鼠數十萬越洞庭湖
望四川而去

明武宗正德初黃州甯均見一鼠盤旋道上忽入地穴
其下得一銅印上篆扶蠻王印四字

王圻曰世宗嘉靖中臨江李鰲授徒湖口所居卑
隘而旁有樓崇敞然封鑰甚固請居之主人曰中

有怪物常魘人死。鰲曰：「邪不勝正，安有是理？」因徙居其中。一日外出，留一冠者攝課，讀夜分，忽一神至，貌甚獐，惡戴金幘，頭絳袍，象簡髯垂至腹，冠者懼不敢仰視。次日鰲歸，言狀。鰲曰：「貴神福人，此貧士之資，何懼？後果再至，袍笏端凝如前。」顧鰲作怒，鰲趨而進，自陳，且有祈請，神不對，但吹鰲左耳耳，即聾。鰲怒，知不免，舉向所備防身大槌盡力一擊，中胸有聲，咄然遁去。遲明報主來索怪踪跡，至北

廊垣曲有大穴一鼠如斗作赤色髯長尺餘稱之
重七斤胸有凝血以中其要害故僅能入穴死王
元貞記

神宗萬厯四十四年七月常鎮淮揚諸郡土鼠千萬成
羣夜銜尾渡江絡繹不絕幾一月方止 四十五年五
月南京有鼠萬餘銜尾渡江食禾稼

愍帝崇禎七年亭夏鼠十餘萬銜尾食苗 十二年黃
州鼠食禾渡江五六日不絕時內殿奏章房多鼠盜食

與人相觸而不畏亦鼠妖也至甲申元旦後鼠始屏跡
又秦州關中鼠化鵠鵠者以數千計十五年二月羣
鼠渡江晝夜不絕十月榆林定邊諸堡鼠生蝦蟆腹中
一生數十食苗如割

欽定續文獻通考卷二百二十八